

現代生活藝術系列

華嚴經疏論纂要 14

— 普賢三昧品

華藏淨宗學會印贈

大方廣佛華嚴經疏論纂要卷第十四

五臺山清涼國師澄觀疏鈔

太原方山長者李通玄 論

閩鼓山私淑比丘道需纂要

普賢三昧品第三

○將釋此品四門同前初來意

〔疏〕來意者前衆既集光示法主。今將說法是故法主。入定受加爲近方便。故次來也。

○二釋名

〔疏〕釋名者。普賢明說法主。以說普法故。三昧是業。

用以非證不宜故。此則人法合舉。普賢之三昧亦此三昧。是普賢所有。又三昧境界。名爲普賢。一切如來藏身爲普賢故。此則普賢卽三昧揀餘定也。

○三宗趣

〔疏〕宗趣者。入法界定。法界佛加爲宗。令法界衆成法界德爲趣。望於後品。亦說世界海爲趣。

〔論〕將釋此品。畧作三門分別。一釋品之名。二釋品來意。三隨文釋義。一釋品名者。理智無邊。名之爲普。智隨根益。稱之曰賢。二之云正。昧之云定。亦云正受爲正定。不亂能受諸法。憶持簡擇。故名正受。

亦云等持。爲正定能發生正慧。等持諸法。是故名  
之等持也。爲普賢爲佛紹法界大智之家。諸佛萬  
行徧周之長子。以答前所問三十七問中。云何一  
切菩薩行海出離海。神通海。波羅密海。世界海等。  
故須入定。善簡衆法。答前所問。令衆迷解。故須入  
定。然普賢菩薩恆無定亂。以示法則。故須如是。又  
以初舉果勸修中。以入定爲法則。後十定品中。明  
十地道滿。起諸想念方真。二釋品來意者。明普賢  
菩薩常在三昧。靜亂總真。然教化衆生。故成法則。  
答所問疑。故爲善簡擇諸三昧出入同異相。故爲

善擇衆生業海果報。佛行業海果報。故須入定。從定起已。說世界成就品。華藏世界品。毘盧遮那品。答前所問故。此品須來。意明初入法。須加定業。以顯真門。後十定品中。明十地真智已終。智隨一切衆生想念。應根接物方是。修道者應如是知。三隨文釋義者。如下。

○四釋文者。文有六分。一三昧分。二加持分。三起定分。四作證分。五毛光讚德分。六大衆偈請分。初中有二。一明此界入定。二類通十方。就初分三。一承力入定。二彰定名字。三明定體用。今初。

爾時普賢菩薩摩訶薩於如來前坐蓮華藏師子之座承佛神力入于三昧

〔疏〕文六一時說偈竟時。二主顯佛普德。唯普賢故。三處依如來者。常對佛故。四所依座。大集云。菩薩得蓮華陀羅尼。故說法處。皆有蓮華。表所入三昧。自性無染。含果法故。五所依因。謂所入深廣。要承力故。六正入三昧。心境冥故。

○三彰定名字

此三昧。名一切諸佛毗盧遮那如來藏身

〔疏〕毘盧遮那。前已廣釋。復有釋言。廣大。生息。具此

三義名如來藏身身卽體也。依也。此有二種。一者修成。二者本性。本性者凡聖俱成。修成者唯諸佛有。諸佛有者。慈悲無邊。故名爲廣。智慧無上。故稱爲大。生相已盡。故云生息涅槃云。離有常住。故名如來。萬德含攝。是謂藏身。卽是出纏之法身也。言本性者。謂卽藏識。包含種子。建立趣生。故名爲廣。本覺現量。與佛等故。名之爲大。新新生。故名之爲生。染淨苦樂。所不能動。故名爲息。卽上法身在纏名藏。謂空不空。空爲能藏。藏不空故。鈔復有釋下。先總釋中。毘

廣大也。盧遮生也。那者息也。卽安國意。諸佛下。初釋修成三義。卽是三德。謂因智斷。言生相盡者。卽

起信意。彼有三。細。謂業。轉。現。總。名。生。相。在。賴。即。識。  
今言盡者。論云。菩薩地盡。覺心初起。心無初相。以  
遠離微細念。故得見心性。心即常任。名究竟覺。釋  
曰。遠離細念。即生相盡也。故次引涅槃。離有常住。  
釋如來義。即第四經。離有即生息也。常住之義。同  
上起信言。本性下。釋本性。本覺現量者。本覺即是  
所證本性。惟真現量。方能證故。與佛等者。起信論  
云。所言覺義者。謂心體離念。離念相者。等虛空界。  
無所不徧。即是如來平等法身。說名本覺。故以等  
佛而釋大也。新新生者。釋生息義。雖別明二字。意  
取即生而息。上約本淨。今約隨染。言染淨苦樂所  
不能動者。上約隨緣。此明不變。又上約生滅。此約  
真如。故約生滅。隨緣。常生約真。如不變。常息。即上  
法身下。別釋藏字。兼釋如來。非報身也。謂空不空。  
標二藏名。起信論云。復次真如。依言說分別。有二  
種義。一者如實空。以能究竟顯實故。二者如實不  
空。以有自體。具足無漏性功德。故釋曰。上即雙標  
空為能藏者。即次論意。論云。所言空者。從本已來。  
一切染法。不相應。故謂離一切法差別之相。以無  
虛妄心念。故當知真如自性。非有相。非無相。非非





具矣。一者自性心上無妄爲空。隨所無者。卽不空德。如空無慳悋。卽顯有檀。空無妄動。顯有性空。故是空藏藏。若不空也。若以光明徧照解毘盧遮那。毘盧遮那。卽是能觀大智。如來藏身卽所觀深理。凡雖理有。佛智方照。又毘盧遮那亦通本有。本有真實識知。徧照法界義故。斯卽本覺。迷而不知。不得其用。唯佛覺此能無不爲。故云一切諸佛揀非凡也。亦非因也。賢首釋云。諸佛徧於一切。卽顯諸佛無不周徧法界刹海。及彼塵中所有諸刹。諸刹塵中。復有諸刹。如是重重不可窮盡。言如來藏身者。明卽此徧刹之身。包容所徧法界刹海。無不皆在如來身。

中。故名藏身。是故融通。總有四句。一身徧刹海。二刹在身中。三身徧身內刹。四刹入徧刹身。卽內卽外。依正混融無礙無障。是此三昧所作。故以爲名。將說此法。故入茲定。賢首云。下敘昔異同。意以身包刹海。塵容法身。得藏身名。但是下文用中一義。攝義不周。不爲正釋。順經宗意。故存而不論。

○三明定體用

普入一切佛平等性。能於法界示衆影像。

**[疏]**此是定相。無量無邊。皆悉依於如來藏說。畧舉其要。句有十三。門乃有七。以後二門收五句。故攝爲六對。後之二門各一對。故文有四節。義唯有三。

至下當明言六對者初二句明體用一對謂無分別智。證平等性以爲定體。影現法界爲勝用也。佛平等性卽如來藏是故但入如來藏身卽是已入佛平等性此爲第一契合佛性門也言勝用者卽示衆影像門。謂能現能生身土智影也

廣大無礙同於虛空法界海旋靡不隨入

〔疏〕次二句深廣一對。廣者無邊不在內外故大者無上。究竟實際故。無礙者無所障故同於虛空。成上三義。通爲廣大無礙門。後句卽入法旋復門。旋卽深也

出生一切諸三昧法。普能包納十方法界。

〔疏〕三有二句。出納一對。初出生三昧門。謂若自相

若其相等一切三昧。皆從此生。此為諸定本故。後

攝受法界門。終歸此故。法界體性故。鈔謂若自相

等六塵入正定者。名為自相。若觀無常空等入定

則名共相。並皆不離。如來藏性。性即真如。故起信

云。真如三昧。是諸三昧之根本。上釋出生一切諸

三昧法。後攝受下。即釋普能包納十方法界。終歸

悉能示現。

〔疏〕四有二句。境智一對。初句能成佛智門。謂不體

此理非佛智故。後示現諸境門。然安立言。總有三  
種。一者世界。安立依報。二者聖教。安立妙義。三者  
觀智。安立諦相。皆法界藏。顯示現前。初句即三句。妙四有二句。  
諸佛智光明海。皆從此生。謂不體此理下。體謂體  
達。若能證入藏身之性。即名佛智。正用起信始覺  
同本。名究竟覺。故生公立體理成照義云。理不待  
照而自了。智必資理而成照。故知理無廢典。弘之  
由人。智雖人用。不在人出矣。故人有照分。功由理  
發。失理則失照。故要見此理。方成佛耳。後句示現  
者。釋經十方所有諸安立海。悉能示現。上攝受法  
界。即言終歸此故。今此即言此能現者。文影畧耳。  
皆自此生。皆歸於此。故知  
萬物依地而生。終歸於地。

含藏一切佛力。解脫諸菩薩智。能令一切國土微塵。  
普能容受無邊法界。

〔疏〕五有二句。卽依正含容門。爲內外含容對。謂內含因果智力。外令塵容法界。由塵全依法界藏現。同真性故。

成就一切佛功德海。顯示如來諸大願海。一切諸佛所有法輪。流通護持。使無斷絕。

〔疏〕六有三句。卽成就攝持門。爲成持人法對。謂初成果人功德大願。後持法輪令不斷絕。由斯玄理。法眼常全故。上言四節者。初四句。明無幽不入。釋上毘盧遮那徧照之義。次四句。無德不生。釋上一切諸佛之義。次二句。內外含容。釋上藏義。後三句。

成德持法。釋上身義。言義唯有三者。入平等性。是定體也。廣大同空。是定相也。餘皆定用。此三圓融。總爲無礙。普賢三昧。

○二類通十方及諸塵道

如此世界中。普賢菩薩。於世尊前。入此三昧。如是盡法界。虛空界。十方三世。微細無礙。廣大光明。佛眼所見。佛力能到。佛身所現。一切國土。及此國土。所有微塵。一一塵中。有世界海。微塵數佛刹。一一刹中。有世界海。微塵數諸佛。一一佛前。有世界海。微塵數普賢菩薩。皆亦入此一切諸佛毗盧遮那如來藏身三昧。



疏於中有二。初舉此。後如是下。類彼中二。初明平徧法界。後明重疊無盡。前中十一句。初一總明。謂盡窮法界。後十別指。以彰曲盡。一盡虛空界。二於空中盡十方處。三於十方中徧三世時。四於三世中微細物處。謂毛端等。五凡諸小隙無礙之處。六或廣大百千由旬等處。七人天日月光明等處。八盡佛眼見處。九盡神力到處。十佛身能現之處。此第十句有二義。一者結上國土之言。通十一段二者成下。以是身內之刹爲微細故。創第十句有二義者。昔人唯有後義。則是佛身中塵。有諸佛刹。遂令普賢不徧。如來身外刹也。二及此下。重疊徧

中畧有四重。一盡法界塵。言及此國土者。指前十  
 處之國也。二塵中多刹。三刹中多佛。四一一佛前  
 有多普賢。於上諸處皆入此定。故普賢身不分。普  
 徧麤細淡廣平滿重疊。此處入定類通。旣然法界  
 入定類通亦爾。故約主定佛前唯一普賢。一切一  
 故。若就類通佛前各有塵數。一切故。三故約主  
定下解妨  
謂難云。別明入定佛前唯一普賢。今此結通何以  
一佛前各有多耶。疏舍二義。一約主件。二明即  
入初主件中。謂為主須一。爲件必多。難云。此中普  
賢應不爲件。應答云。若爲件時亦得有多。二者即  
由上義故此一。是即多之一。故疏云。一切之一。故  
彼類通中。多是全一之多。故疏云。一切故前是  
舉一結多。此是即一即多。前是通辨緣起相由。今  
明力用交徹。一有一一切等。故普賢身不可思議。畧

有三類。一隨類身。隨人天等見不同故。二漸勝身。  
乘六牙象等相莊嚴故。三窮盡法界身。帝網重重。  
無有盡故。今當第三。舍  
有前二所由有三等。

○第二加分有三。初口加。次意加。後身加。今初

爾時一一普賢菩薩皆有十方一切諸佛而現其前。  
彼諸如來同聲讚言。善哉善哉善男子。汝能入此一  
切諸佛毗盧遮那如來藏身菩薩三昧。佛子。此是十  
方一切諸佛共加於汝。以毗盧遮那如來本願力故。  
亦以汝修一切諸佛行願力故。所謂能轉一切佛法  
輪故。開顯一切如來智慧海故。普照十方諸安立海。  
悉無餘故。令一切衆生淨治雜染得清淨故。普攝一

切諸大國土無所著故。深入一切諸佛境界無障礙。故普示一切佛功德。故能入一切諸法實相增智慧。故觀察一切諸法門。故了知一切衆生根。故能持一切諸佛如來教文海故。

〔疏〕文四一諸佛現身。以此口加。後無結通。故此總舉重重時處。一一普賢前也。二彼諸下。讚其得定。此雖果定。菩薩門入。故云菩薩三昧。三佛子下。明得定所由。所由有三。一伴佛同加。佛佛道同。故二主佛本願。此二爲緣。三自修行願。是入定因。四所謂下。辨加所爲。此文二勢。一辨加所爲。二顯上行。

願之相故云所謂也。所為謂何。為轉法輪故。有十  
 一句。初總餘別。別中初一。總攝十智。餘九即有十  
 海。一即安立海。二即眾生及業海。三即世界海。四  
 即佛海。五即名號壽量及解脫海。變化大用。皆功  
 德故。六即波羅密海。到實相岸故。七轉法輪海。八  
 即根海。九即演說海。與下十智。令知此十。即餘九  
海者。就十海名。二處具出。影帶鈎鎖。文該五處。言  
 二處者。一現相品。衆海問中十海。二成就品。初標  
 章答中十海。然文小異。開合不次。言文該五處者  
 二處如前。三即此所為中。是為十海。故四者即下  
 意加與智。即十海智。故五世界成就品。答中。稱歎  
 十智。即是知此十海之智。正是此中。諸佛所與十  
 智也。此上五處。二處是海。二處是智。其所為中。雖  
 無海言。而是海義。然其五處。決定相承。謂由問十

海故。加所爲中。爲於十海。佛與十智。令知十海。皆賢得智。將欲說之。故觀察十海。知海難思。唯佛智。能知。故稱讚十智。亦是讚所得之智。方能遂佛所爲。答前問也。而其五處。開合廣畧者。顯義無方故。

○第二意加

爾時十方一切諸佛。卽與普賢菩薩摩訶薩。能入一切智性力智。與入法界無邊量智。與成就一切佛境界智。與知一切世界海成壞智。與知一切衆生界廣大智。與住諸佛甚深解脫無差別諸三昧智。與入一切菩薩諸根海智。與知一切衆生語言海轉法輪詞辯智。與普入法界一切世界海身智。與得一切佛音聲智。如此世界中。如來前普賢菩薩蒙諸佛與如是。

智。如是一切世界海。及彼世界海。一一塵中所有普賢。悉亦如是。何以故。證彼三昧法。如是故。

〔疏〕文二。先加。後釋。前中亦二。先此土。後類通。前中與十種智。初一總。謂與果海之智而言。與者。佛力灌注。令增故。一切智性。卽果海也。智性卽力。無領動。故具十力故。末後智字。卽能入也。餘九爲別。卽是成就品中十智。由與此智。故後能說彼智觀彼十海。而文少不次。一卽第三法界安立海智。安立無邊量故。二卽第四佛海。佛海唯佛分齊之境。三卽第一。四卽第二衆生業海。業因微細。故云廣大。

五含二句。一卽第八佛神變海。解脫作用卽是神  
 變。神變依定加三昧言。一含三世智。下文一念知  
 三世。由佛不思議解脫力故。由加總句。故合此二。  
 六卽第五七卽第九八卽第七願海以願力故入。  
 法界中一切世界九卽第十建立演說。中二別別  
對釋。欲對下智。須知十智名字次第。彼云諸佛子。諸佛世尊。知一切世界海成壞清淨智。不可思議。知一切衆生業海智。不可思議。下畧。不可思議。而加次第。三知一切法界安立海智。四說一切無邊佛海智。五入一切欲解根海智。六一念普知一切三世智。七顯示一切如來無量願海智。八示現一切佛神變海智。九轉法輪智。十建立演說海。不可思議。經脫智字。然疏中易者。則  
 但對次第難者已爲會釋。竝可知也。又菩薩根更



有多義。修十善道。有三善根。修諸地度。精進爲根。攝受正法。信慧爲根。攝養衆生。慈悲爲根。爲成佛道。悲智爲根。種種差別。皆善知故。二如此下。類通可知。第二何以故下。釋所因中。二先徵意云。諸佛有力能與。有慈能普。何以十智。偏加普賢。釋云。普賢得此三昧。法爾應與。

○第三身加

是時十方諸佛各舒右手。摩普賢菩薩頂。其手皆以相好莊嚴妙網光舒。香流燄發。復出諸佛種種妙音。及以自在神通之事。過現未來一切菩薩普賢願海。

一切如來清淨法輪。及三世佛所有影像。皆於中現。如此世界中。普賢菩薩爲十方佛所共摩頂。如是一切世界海。及彼世界海。一一塵中所有普賢。悉亦如是。爲十方佛之所摩頂。

〔疏〕文二。初此土。後如此下。類通前中復二。先佛手摩頂。明加被攝受。又準梵本。明十方佛身皆不來此。舒臂不必長。而同時摩頂。各全觸頂。互不相礙。皆是如來自在業用。二其手下。辨手相用。於中十句。以顯無盡。前五德相圓備。謂臚纖直等。故云相好莊嚴。鈔謂臚圓者。臚纖之言。言兼相好。按大般若若三十二相中。第九雙臂修直臚圓。如象

王鼻斯則臚直是相。手連臂故。纖者。三十二中云。五世尊手足。所有諸指。圓滿纖長。甚可愛樂。言兼好者。八十好中。手足指為二十。以一指為一好。謂十指端皆圓。纖可喜。故而云等者。即妙網光。舒此言顯。故三十二中云。四世尊手足。二指中間。猶如鷲王。威有網鞞。金色交絡。文同綺畫。即是相也。畧舉此五廣如。後復出下五句。明妙用自在。意明此手。亘十方而包三世。收因果而該人法。深廣體用。無邊自在。非言能說也。亘十方者。一切諸言。即橫世也。菩薩因也。諸佛果也。上一二皆人法。輪法也。頓具為深。橫該為廣。相好即體。出生等用。皆悉圓融。名無邊自在。謂即橫。即豎。即人。即法等。後結通可知。

○第三起定分。所作事竟。故於中二。初此界。後類通。前中亦二。初起定。後眾益。今初。

爾時普賢菩薩。卽從是三昧而起。從此三昧起時。卽從一切世界海微塵數三昧海門起。所謂從知三世念念無差別善巧智三昧門起。從知三世一切法界所有微塵三昧門起。從現三世一切佛刹三昧門起。從現一切衆生舍宅三昧門起。從知一切衆生心海三昧門起。從知一切衆生各別名字三昧門起。從知十方法界處所各差別三昧門起。從知一切微塵中各有無邊廣大佛身雲三昧門起。從演說一切法理趣海三昧門起。

**疏**初起王定。一從此三下。起眷屬定於中亦一初

總謂一起一切起。由此妙定。卽是一切三昧海故。餘定爲門。皆入此故。彼全同此。亦受海名。二所謂下。別辨塵數。旣多。畧列其十。一卽能知智。二昧。謂無一念慳差。故云念念無差。而不廢徧知。爲善巧智。二卽所知塵境。上能所一對。三現廣利。四現居處。卽於世界總別一對。楞伽經云。如來藏識。頓現一切身器。及諸受用。器卽廣利。受用卽是舍宅。五知心念差別。六知身相名字。卽衆生色心一對。七知廣處。八知廣身。卽依正一對。九從知一切法理趣者。上八約事。別別門顯。此約理趣。總該諸法。故

云一切大般若經理趣分說諸法皆空無生無滅  
無自性性離一切相不可願求然第一義湛然常  
住當知卽是此如來藏上來九句唯第三四從現  
得名餘七皆從所知立稱如此等類有一切世界  
海微塵數合爲一定卽知此定是一切定耳

○二大衆得益

普賢菩薩從如是等三昧門起時其諸菩薩一一各  
得世界海微塵數三昧海雲世界海微塵數陀羅尼  
海雲世界海微塵數諸法方便海雲世界海微塵數  
辯才門海雲世界海微塵數修行海雲世界海微塵

數普照法界一切如來功德藏智光明海雲。世界海  
微塵數一切如來諸力智慧無差別方便海雲。世界  
海微塵數一切如來一一毛孔中各現衆刹海雲。世  
界海微塵數一一菩薩示現從兜率天宮歿下生成  
佛轉正法輪般涅槃等海雲。

**疏**初標益時分。亦是得益所由。後其諸下。正明得  
益減數說九。初五得菩薩法門。句各一義。皆以前  
定。含此諸義故。又此五句。後後成前前。後四得佛  
果法。卽如來三業。一得照藏身之實智。二得藏身  
力用之權智。三身毛現刹。四應垂八相。義兼口轉。

亦以藏身含此義故。普賢出定。他人益者。感應道  
 交故。如春萌芽。陽氣久滿。東風一拂。衆蕊齊敷。諸  
 菩薩衆。積善已深。久同行願。纔觀勝境。萬德頓圓。  
 冥顯雙資。于何不可。資以暗成。故現業爲顯。資以冥  
昭著故。今當俱句。亦有冥而非顯。但有宿善故。復  
有顯而非冥。現身精勤。宿無因故。其非冥非顯。此  
非機感。設欲成機。乃是大悲通相。所被此上四句。  
但約於機對機說應。亦有四句。一冥應。今所得功  
德。不自覺知。二顯應。現形說法。光照現相。等三俱  
四俱非。俱非不名爲應。若取大聖無心。卽應無應。  
亦得名應。

○二類通

如此世界中。普賢菩薩從三昧起。諸菩薩衆。獲如是



益如是一切世界海。及彼世界海所有微塵。一一塵中。悉亦如是。

疏可知

○第四現相作證分

爾時十方一切世界海。以諸佛威神力及普賢菩薩三昧力故。悉皆微動。一一世界衆寶莊嚴。及出妙音。演說諸法。復於一切如來衆會道場海中。普雨十種大摩尼王雲。何等爲十。所謂妙金星幢摩尼王雲。光明照曜摩尼王雲。寶輪垂下摩尼王雲。衆寶藏現菩薩像摩尼王雲。稱揚佛名摩尼王雲。光明熾盛普照

一切佛刹道場摩尼王雲。光照十方種種變化摩尼王雲。稱讚一切菩薩功德摩尼王雲。如日光熾盛摩尼王雲。悅意樂音周聞十方摩尼王雲。

疏得益心喜。喜則地動。及有諸瑞。諸會聞竟得益。故現相居後。此會雖卽未聞。已先得益。故先現瑞。以此會辨果顯殊勝故。文中有四。一世界微動。兼出瑞因。由因果二力。言微動者。是前相故。二衆寶莊嚴。三出音說法。四復於下。佛會雨寶。畧舉十種。以顯無盡前三事相寶。後七法化傳通寶。並是出世善根所生。

○第五毛光讚德分

普雨如是十種大摩尼王雲已。一切如來諸毛孔中。咸放光明於光明中而說頌言。

〔疏〕於中二。初結前生後。後正顯偈詞。

普賢徧住於諸刹。坐寶蓮華衆所觀。

一切神通靡不現。無量三昧皆能入。

〔疏〕詞中十頌分三。初一總述前定。次八別顯徧相。後一結讚所由。

普賢恒以種種身。法界周流悉充滿。

三昧神通方便力。圓音廣說皆無礙。

一切剎中諸佛所

種種三昧現神通

一一神通悉周徧

十方國土無遺者

如一切剎如來所

彼剎塵中悉亦然

**[疏]**別顯中二。前二偈半。直述前徧

所現三昧神通事

毗盧遮那之願力

**[疏]**後五偈半。舉因顯徧於中二。初半偈緣力徧

普賢身相如虛空

依真而住非國土

隨諸衆生心所欲

示現普身等一切

**[疏]**後五因力徧於中四。初偈卽體而用故徧。前半

體後半用。身相如空。法性身也。依真而住。法性土

也。隨機普應。受用化也。問法性身土。爲別不別。別則不名法性。性無二故。不別則無能依所依。答。經論異說。統收法身。畧有十種。土隨身顯。乃有五重。一佛地論。唯以清淨法界而爲法身。亦以法性而爲其土。性雖一味。隨身土相而分二別。智論云。在有情數中。名爲佛性。在非情數中。名爲法性。假說能所而實無差。唯識云。雖此身土。體無差別。而屬佛法性。相異故。謂法性屬佛。爲法性身。法性屬法。爲法性土。性隨相異。故云爾也。今言如虛空者。唯識論云。此之身土。俱非色攝。雖不可說形量大小。

然隨事相。其量無邊。譬如虛空。徧一切處。故如虛空言。通喻身土。一或唯大智而爲法身。所證真如爲法性土。無性攝論云。無垢無罣礙。智爲法身故。若爾云。何言相如虛空。智體無礙。同虛空故。三亦智亦如而爲法身。梁攝論及金光明。皆云。唯如如。及如如智獨存。名法身故。此則身含如智土。則唯如。四境智雙泯而爲法身。經云。如來法身。非心非境。土亦隨爾。依於此義。諸契經中。皆說如來身土無二。此則依真之言。顯無能所。方曰。依真成如空義。五此上四句。合爲一無礙法身。隨說皆得。土亦

如之。六。此上總別五句相融形奪。泯茲五說。迥然無寄。以爲法身。土亦如也。此上單就境智以辨。七。通攝五分。及悲願等所行恆沙功德。無不皆是此法身收。以修生功德。必證理故。融攝無礙。卽此所證真如體大爲法性土。依於此義。身土迥異。今言身相。卽諸功德言如虛空。卽身之性。下經亦云。解如來身。非如虛空。一切功德無量妙法所圓滿故。八。通收報化色相功德。無不皆是此法身收。故攝論中三十二相等。皆法身攝。然有三義。一。相卽如故。歸理法身。二。智所現故。屬智法身。三。當相竝是

功德法故名爲法身其所依土則通性相淨穢無礙我此土淨而汝不見衆生見燒淨土不毀色卽是如相卽非相身土事理交互依持通有四句謂色身依色相土色身依法性土法身依法性土及依色相故又以單雙互望亦成五句謂色相身依法性色相土等準以思之卽鈔我此土淨而汝不見淨土不毀卽法華第五疏如下引色卽是如相卽非相卽義引大品等經身土事理交互徹故結前生後然結前三文成上三義謂引淨名成第二當相卽是功德身土則具妙莊嚴通自佗受用二引法華成智法身土亦通性相智所現身者若大圓鏡智現自受用身平等性智現佗受用身成所作智現變化身此三身融則三土亦融變化則毀自佗受用皆悉不毀我此土安隱卽自受用天人常



充滿。卽佗受用。三義引大品。色卽是如。成第一義。  
 相卽如故。如卽法性土。相通諸土。卽法性身與色。  
 相身無礙。依土亦性相無礙。是故結云。皆事理交。  
 互。言生後者。生後四句。文有兩重。四句。初四唯單。  
 相對其色。相言。通於報化。自受用報化。他受用報。  
 皆色相故。二又以單對複。成四句。唯出其。一。令準。  
 思於五。上卽第一。二法性身。依色相。法性土。三法。  
 性色相身。依色相。土。四法性色相身。依法性土。第。  
 五。有一俱句。謂法性色相身。依法性色相。土。則。  
 是性相無礙之身。依性相無礙之土。此上猶。  
 通諸大乘教。九通攝三種世間。皆爲一大法身。具。  
 十身故。其三身等。竝此中智正覺攝故。土亦如之。  
 卽如空身。而示替身。于何不具。此唯華嚴。九通攝。  
 地中十身。卽三世間故。謂衆生身。國土身等。已見。  
 玄文。卽如空身者。會釋經文。謂經但云身相如空。  
 等。何有十身之義。故今釋云。如虛空言。卽十身中。  
 虛空身也。八地之中。十身相作。今云示現替身。則。

兩重十身。皆悉具矣。如下云。以虛空身作衆生身。作國土身。作業報身。作聲聞身。作緣覺身。作菩薩身。作如來身。是爲虛空示餘九身。其如來身上。既具苦提身。願身。化身。法身。智身等。則有百身千身。一類身復各攝多。故云。示現普身等一切也。又如虛空言。合法身智身。卽是真身。卽真而現。何不具。十上分權實。唯有第九。屬於此經。若據融攝。及攝同教。總前九義爲一總句。是謂如來無礙身土。普賢亦爾。義隨隱顯。不可累安。逵者尋文。無生局見。十上分權實者。爲揀淺深。以分權實。故前八非實。若不攝權。亦非眞實。如說海水。異於百川。不攝百川。非海水矣。隨義布列。有十不同。得意而談。一一融攝。上言土有五重者。一唯法性。屬前三身。二者雙泯。屬於第四。三具性相。五六七八所依。四融三世間。屬於第九。五總前

諸義卽第十依。上言土有五重下。三別示土相。謂前三如智。有離合之殊。故分三身。

其所依土。唯一法性。餘可思準。

普賢安住諸大願 獲此無量神通力

一切佛身所有刹 悉現其形而詣彼

一切衆海無有邊 分身住彼亦無量

疏二一偈半。大願故徧。兼顯徧於正中之依也。重

重皆徧。今不見者。機不應故。不見卽是虛空身故。

亦徧不見處故。鈔重重皆徧下。通其妨難。難云。如

不見。釋有三意。一約機不見。是旨者。過二不見。是見見。虛空身。謂以虛空不可見故。若不見者。真見虛空。三亦徧不見處故。若明見則不徧。何者。以可見。不可見。皆是普賢身。要令可見。爲身。則普賢身。

不周萬有。如智不可見。豈非智身耶。明知由有不見之處。方知徧耳。此第二身。何人能見。慧眼方見。非肉眼所見。慧眼無見無不見故。

所現國土皆嚴淨 一刹那中見多劫

普賢安住一切刹 所現神通勝無比

震動十方靡不周 令其觀者悉得見

〔疏〕三有一偈半。明所現超勝

一切佛智功德力 種種大法皆成滿

以諸三昧方便門 示已徃昔菩提行

〔疏〕四有一偈。果德已滿。不捨因門

如是自在不思議 十方國土皆示現

爲顯普入諸三昧

佛光雲中讚功德

〔疏〕第三一偈。結讚所由者。自在難思。現無不普。標入一定。實則普游。非佛光雲。安能讚述。

○第六大衆讚請分

爾時一切菩薩衆。皆向普賢。合掌瞻仰。承佛神力。同聲讚言。

〔疏〕前衆問佛。佛示法王。衆覩定起。故讚請普賢。前但舊衆。此通新舊。故云一切。所問同前。故但畧舉。從諸佛法而出生。亦因如來願力起。眞如平等。虛空藏。汝已嚴淨此法身。

[疏]十頌分三。初八歎主請彰其能說。次一舉法請。正陳所疑。後一歎衆請。明有堪聞之器。前中二初五頌。歎普賢因果深廣德。明有說因。後三歎能徧塵刹雨法德。明有說果。今初偈各一義。初一讚已淨法身三句。明因。一句。明果。因有三義。一因修法生義。通緣了。二由大願起。卽是緣因。三依如來藏證真平等。此爲正因。真如卽是不空。虛空卽是空藏。平等與藏通。上二義。釧一因修法生等者。然準涅槃緣因對於正因了。因對於生因。而緣亦名了。如醉煖等爲酪緣因。卽能了彼乳中之酪。令得成酪。而今開異義。小殊故了。謂照了。不通於生緣。謂衆緣義。通生了。今從別義。又對正因。是真如。故云通緣了。如不可生。故但名。

了。偈云。出生者。出於二障。故曰出生。非生真如。諸佛法言。通教理。行果。通於二因。義如上說。真如卽是不空者。此言不空。自有二義。一空者。所謂生。死不空者。是謂真如。涅槃。二對下。空藏。是不空藏。妙有之中。含性德。故平等與藏者。藏通真如。是不空。如來藏。藏通虛空。是空。如來藏。平等通二者。一真如體性平等。二虛空無相平等。此二不二。是真平等。悟法性空。是真如。故經云。汝已嚴淨。此法身者。對上真如。卽是法身。出障。名淨。因華行滿。是已莊嚴。易故不釋。

一切佛刹衆會中

普賢徧住於其所

功德智海光明者

等照十方無不見

〔疏〕二讚徧住佛刹。第三句徧因。餘皆徧相。因中具

智莊嚴。故能等照。具功德嚴。令無不覩。

普賢廣大功德海

徧徃十方親近佛

一切塵中所有刹

悉能詣彼而明現

〔疏〕三讚近佛

佛子我曹常見汝

諸如來所悉親近

住於三昧實境中

一切國土微塵劫

〔疏〕四讚常定實境中者。不隨想轉故。曹者。輩也。

佛子能以普徧身

悉詣十方諸國土

衆生大海咸濟度

法界微塵無不入

〔疏〕五讚度生。曲盡微塵者。細處有多衆生故。

鈔細處有

多衆生者。卽離世間品五十五經十種如金剛大乘誓願心中第二心云。菩薩摩訶薩。又作是念。於一毛端處。有無量無邊衆生。何況一切法界。我當盡以無上涅槃而滅度之。是爲第二。如金剛大乘



誓願心。今云法界微塵無不入與一毛端處。大意同也。

入於法界一切塵 其身無盡無差別

譬如虛空悉周徧 演說如來廣大法

一切功德光明者 如雲廣大殊勝

衆生海中皆徃詣 說佛所行無等法

為度衆生於劫海 普賢勝行皆修習

演一切法如大雲 其音廣大靡不聞

疏二有三頌說法果中。初一讚常演大法。如空之

言。下喻廣大。前喻無盡無差。鈔明有說果者。此有

上說因。名為說果。二稱根令喜。是說法果。今具二  
意。謂具功德光明廣大勝力等。即說法因。今能徧

說即是說果。是初意也。二由上徧說勝法能度衆生。卽是後義。以稱根故。次一讚說無等法。無等有二。一能說力勝。具二嚴故。二所說無等。說佛所行故。後一頌舉因結果顯德。有由曠劫因圓故。故能雲雨說法。

國土云何得成立

諸佛云何而出現

及以一切衆生海

願隨其義如實說

〔疏〕一一頌舉法請中。前品所問。雖有多門。統其要歸。莫過三種世間。故今三句。各顯其一。又前問總該諸會。此令當會答故。

此中無量大衆海

悉在尊前恭敬住

爲轉清淨妙法輪

一切諸佛皆隨喜

〔疏〕末後一頌歎衆請亦名自述。此有二義。一恭敬一心內堪受法。二諸佛隨喜外有勝緣。故應說也。說則上順佛心。下隨物欲。

〔論〕問曰。何故前世王妙嚴品末其地六種十八柑大動。此品何故其地微動。答曰。前明如來始成正覺。大衆賀佛。及自皆得佛果之益。其益廣大。明位極行終。以此其地大動。此品答世王所問之疑。爲成初信。故其地微動。於中菩薩示有疑問。寄同得益。皆是成其凡夫始信之心。是故名爲舉果勸修。

生信分。仍是信他佛及菩薩得。然未是信自心得也。第二會中。金色世界不動智佛已去。方明信片自心得。亦然也。至第十二卷中。諸世間王更作二十八問。方明信片自心是佛不動智等。至文方明。此經直至法界品。覺城東已來。菩薩及一切大衆。皆是寄法同迷。示行修證。唯覺城人間五百童子童女。優婆塞。優婆夷。各具五百。一萬諸龍。寄位是凡。表其凡夫有得入者。故若無實得者。佛教豈是虛行者哉。聖者立樣。今凡實得。終不虛施。應如是知。應如是信。不自欺誑。若有人言。此經非是凡夫境界。

是菩薩所行。是人當知滅佛知見。破滅正法。令其正教。世不流通。令其世間。止見不生。斷滅佛種。諸有智者。不應如是不勸修行。設行不得。不失善種。猶成來世積習勝緣。故於此佛毛孔光明說頌中。已下。有兩段頌。於初二十行頌。明佛毛孔光明。讚普賢德。如文具明。毛孔光是萬行光。還歎普賢萬行。二爾時一切諸菩薩已下。有二十行頌。明大衆歎普賢。并請說後三品之法。亦如文具明。釋三昧之名者。於此三昧名中。義分爲三。一釋三昧名。二釋三昧體用。三歎三昧之德。一釋三昧之名者。名

毘盧遮那如來藏身。毘盧云光。遮那云種種徧照。如來是法性之體。藏身是含容衆法之智。明以理智種種教行之光照燭衆生之器。隨根與益。如經歎德中具明二釋三昧之體用者。此三昧體者以法界根本智爲體。以差別智爲大用。又以法界根本智爲體。隨衆生智爲用。又以入三昧爲體。出定爲用。又以無入無出爲體。又入出俱爲用。又以入出俱爲體。以義準之可見。大要言之。且以爲化衆生法則之中。以入定明體。後從定起。顯示十種定名。是用於十箇定名中。總以法界無依任智性爲

體。此體亦名首楞嚴定。與不可說一切諸三昧諸智慧門爲體。如歎德中具明。如經云。世界海漩無不隨入者。三昧之用。徹徧一切衆法之名故。海者。廣大義。漩者。甚深義。明此三昧體用廣大。甚深無盡諸佛菩薩。及一切十方六道衆生中行皆徧故。此一二三昧。答前三十七問總盡。向前以佛神力。答前三十七問中云。何是佛地。佛海。佛眼。佛耳鼻等。今普賢三昧。答前三十七問中云。何菩薩行海。三昧海等問。爲欲明佛行菩薩行體用徹故。以佛爲體。普賢行海爲用。以此體用。該通諸法。無法不盡。

故佛眼耳鼻舌身意爲體。能徧知衆生事業爲用。已下如來與普賢智。明普賢智。契合佛根本智。二智不殊。令後信者信自智佛根本智。一體無二無疑。故十方諸佛手摩其頂者。明接引忍可。言普賢從三昧起者。明定體隨根用。處彼復依根獲益。名起。其用無盡。畧舉其十。以表無盡。故餘義經文自具。意明佛根本智是定體。普賢是用。

普賢三昧品竟



浙江處州府景寧縣四都吳坑弟子吳  
希孟法名興進同室張氏亡室葉氏男  
長耀長炳捐貲刻此  
華嚴經菩提賢三昧品疏論纂要一卷伏  
願四恩普報三有均資現生命運昌隆  
當來靈苗增秀  
康熙十八年己未六月既望日謹誌

大方廣佛華嚴經疏論纂要卷第十四